

Tusagassiutit nukittuut aamma inuiaqatigiit nukittuut

2015-imut Aningaasanut inatsisip isumaqatigiinniutigineqarneranut atatillugu isumaqatigiissuteqartoqarpoq. Isumaqatigiissummi saqqumivoq Naalakkersuisut sulissutigissagaat KNR 1. januar 2016-imiit pilerisaarutisigut aningaasalersugaajunnaassasoq. Naalakkersuisut isumaqatigiissutip tassunga tunngsortaa piviusunngortinniarlugu radiukku tv-iikkullu aallakaatitsisarneq pillugu Inatsisartut inatsisaata nr. 7, 8. juni 2014-imeersup allannguutissaanik suliaqarnikuupput. Naalakkersuisut tamatumunnga allannguutissatut siunnersuummut atatillugu tusarniaanermi akissutinik tigusaqarlutik, taakkualu tunngaviliipput inatsisissatut siunnersuut taamatut isikkoqartillugu Inatsisartut 2015-imi ukiakku ataatsimiinneranni saqqummiunneqannginnissaanut.

Isumaqatigiissuteqartut akornanni isumaqatigiissut siuliani pineqartoq allanngortinneqassasoq isumaqatigiissutigineqarpoq, Naalakkersuisut sulissutigiinnassagaat inatsisissatut siunnersuummik KNRi pilerisaarutillu pillugit tamakkiisuunerusumik suliaqartoqarnissaa ukunanga marlunnit imalimmik:

A) KNRip kanaaliini pilerisaaruteqarneq pillugu

Taamatut tamakkiisuunerusumik siunnersuusiornikkut ineriartortitsisoqassaaq KNR-imut isertitsissutaasussanik allanik suliaqartarnermut killiliussat annertusineqarnissaanik kinguneqartussamik, taamaaliornikkut KNR-ip kanalit nuna tamakkerlugu aallakaatitsivigisartagai aqutissiuunneqarsinnaanngorlugit tusagassiornikkut ingerlatsiviit allat peqatigiiffillu, piffinni TV-qarfiit radioqarfiillu aqutigalugit isertitsissutaasussanik suliniutinik pilersitsisoqartalernissaanut.


B) Innuttaasunut paasissutissiisarnerit pillugit

Nalilersuisoqassaaq aalajangersaasoqarlunilu qanoq aqqissuussinikkut ingerlatseqatigiiffiit / suliffeqarfiit KNR-ip kanaalii aningaasartuutiviusunik akiliisalernermikkut innuttaasunut inuiaqatigiinnut tunngasumik paasissutissanik KNR ingerlatitseqqitalersinnaanersoq pillugu. Tamanna tamaallaat ingerlatseqatigiiffik inuiaqatigiinnut sammisumik siunnerfeqartoq nalilerneqarpat atuisartunut paasissutissanik inuiaqatigiinnut pingaaruteqartunik ingerlatitseqqittussaasoq. Piumasaqaatinik tamatigoortunik naapertuilluartunillu aalajangersaasoqassaaq, suut "innuttaasunut paasissutissiinertut" tamatumunnga atatillugu isigineqarsinnaanersut pillugit, taakkualu sapinngisamik naapertuilluartumik qanoq ingerlatseqqinneqartarsinnaanersut pillugit, kiisalu oqartussaasut kikkut aalajangiisuusassanersut tamatumunnga atatillugu nalornissuteqartoqarsimatillugu. Pisortatigoortumik KNRip kanaaliisigut innuttaasunut paasissutissiisinaanermut periarfissaareersut allannguuteqassanngillat.

KNR-imut killiliussat allannguuteqartut aningaasaqarnermut tunngatillugu nalilersorneqassapput, pingaarnertullu KNR-imut aningaasaqarnikkut allannguuteqartitsissanatik, imaluunniit naapertuuttumik KNR-imut matussutissarsineqassallutik aningaasanut inatsisikkut aningaasaliisoqarneratigut.

Isumaqatigiissutigineqarpoq Naalakkersuisut anguniakkat siuliani pineqartut piviusunngortinniassagaat Radiukku TV-iikkullu aallakaatitsisarneq pillugu inatsisip 2016-imi Inatsisartut katersuunneranni allannguuteqartinneqarneratigut. Isumaqatigiissutigineqarportaaq Naalakkersuisut sullap ingerlatseqqinneqarnerani suliamut tunngasumik tusagassiteqarnermi susassaartunik qanimut oqaloqateqartassasut, inatsisissatut siunnersuummik inaarutaasumik tusarniaatiginnittoqannginnarani.


Nuuk, 21. september 2015



Jens Immanuelson


Siumut

Steen Lynge



Atassut

Tillie Martinussen



Demokraatit